

## Oppalaš mearrádusat 2017

1. Náittosdilli lea go guokte olbmo almmolaččat, duođašteddjiid gullut ja dohkkehuvvon (boargárlaš dahje girkolaš) eiseválddi ovddas nanneba goabbat guoibmáseaska lohpadusa eallit ovttas náittosdilis. Náittosdilli lea dohkkehuvvon go almmolaččat lea dahkkojuvvon.
2. Náitaleapmi girku ortnega vuodul lea sihke juridihkalaš ja girkolaš. Dat mii servodaga lágaid vuodul lohkkoujvvo náittosdili ásaheapmin, doaimmahuvvo Ipmila muođuid ovddas. Danin dát lea girkolaš doaimmahus ja dan vuodđun lea ipmilbálvalusvuohki. Danin buot doaimmat, nugo musihkka, jitnositlohkan ja eará sisdoallu galget heivehuvvot dasa.
3. Vihapeapmi dáhpáhuvvá girkus dahje eará ipmilbálvalusbáikkis maid bisma lea dohkkehan vihahanbáikin.
4. Ovdal vihaheami galgá son gii vihaha – vejolaččat soames eará su sajis – ságastallat náittosbárain.
5. Sálmmaid ja lávlagiid dohkkeha dat báhppa gii vihaha náittosbára, ja kantor/organista dohkkeha musihka.
6. Vihapeapmi sáhtá almmuhuvvot searvegotti ipmilbálvalusas ovddalgihtii, ja bárra namuhuvvo ovddasrohkosis.
7. Jus náittosmeassu dollojuvvo, de sáhtá čuovvut ortnega Vihapeapmi gitta maŋemus sálmma rádjái. Dat sálbma lea dalle sálbma eahkedismállásiid ovdal. Das maŋnil lohkkoujvvo eahkedismálisrohkosis mii čuožžu Ipmilbálvalusgirjjis. Sáhtá maid válljet Váldoipmilbálvalusa ortnega. Dalle eai lohkkoujvvo váldoipmilbálvalusa Álggahansánit, muhto vihahanortnega Álggahansánit. Ja vihahanortnega lađas 4 Čálalohkan lohkkoujvvo dan sadjái go váldoipmilbálvalusa Čálalohkamat. Okta čálalohkan lea evangeliumteaksta. Lađđasat Náitaleapmi ja Suorbmasiid bidjan leat lađđasa Diedáhusat sajis. Vihahanortnega lađas 9 Ovddasrohkosis lohkkoujvvo váldoipmilbálvalusa ovddasrohkosa sadjái.

Lađđasis Álggahansánit almmuhuvvo náittosmeassu, ovdamearkka dihte ná:

**L |** Ráhkis (*namma daddjo*) ja (*namma daddjo*). Doai leahppi bohtán (*girku namma daddjo*) náitalit.

Mii leat čoagganan dása illudit dudnuin ovttas. Mii gullat dudno lohpadusaid goabbat guoibmáseatte ja rohkadallat Ipmila buressivdnádusa dudnuide ja dudno ruovttu badjeli.

Doai háliideahppi searvat Hearrá eahkedismállásiidda dál go dudno ovttaseallin álgá náitalan olmmožin. Danin mii ávvudit dán doaimmahusa náittosmeassun, vai earát maid ovttas dudnuin besset searvat Hearrá eahkedismállásiidda dán beaivvi.

8. Náittosbárat geat leat náitalan boargárlaš eiseválddi ovddas, ožžot bivdit girkolaš ovddasrohkosa. Geahča ortnega Ovddasrohkosis boargárlaččat vihahuvvon náittosdili ovddas 2017.
9. Girkobielluin sáhtá čuojahuvvot sullii 5 minuhta ovdal ja maŋnil vihaheami.
10. Liturggas lea vilges stola.